

目 錄

37期 (1995年2月)

- P1. 『感謝kap反省兼年底報告』，台文通訊台灣聯絡處／陳明仁
- P3. 【心適ê台語之一】『阿義ê故事』，陳憲國
- P3. 『惡人無膽』，洪錦田
- P4. 『拯救母語臺灣話並振興羅馬字臺語文』，許斌碩牧師
- P5. 『你嘴裡ê話有真chē是日本進口ê』日本用語流傳入境ê過程kap文化ê含意，編輯室 節譯
- P7. 『落雨天』，Tân Hui-Chhiong
- P7. 『台灣原本美麗島』，阿樹
- P8. 【心適ê台語之二】『澎湖人』，陳憲國
- P9. 『鳳凰起飛ê時陣』（小說），陳雷
- P10. 『鳳凰起飛ê時陣』（La-li-oh 廣播劇），陳雷

- P11. 【心適ê台語之三】『一百外斤ê giâ-kang』，陳憲國
- P12. 【台文寫作會作品】『挽面』，黃佳惠
- P13. 「客語教室」第五課，『台中關係』(Thoi3-chung5 kôan-he)
- P13. 『台文通訊收支報告』
- P14. 【語言學筆記之四】『語言kap方言』，李勤岸
- P14. 『生』，寶惠
- P15. 『語文動態』



台文通訊

1995年2月

37期

Editor: Te Liöng-Kóng

Publisher: Chhōng-Bî Memorial Fund, USA

感謝 kap 反省兼年底報告



◎台文通訊台灣聯絡處 / 陳明仁

全世界tak個國家攞有個家己ê問題，m̄-koh罕得有親像台灣hiāh複雜ê。做一個台灣人，kan-taⁿ煩惱一般性ê社會問題無算，iāu-koh有國家問題——國家定位、國家安全、國家前途，連國家ê名稱都有問題；官方ê中華民國別國無承認，咱mā無kah-意，咱意愛ê名是——台灣。

Behka台灣當做一個國家mā有真chē問題，外來統治者當然會反對，chē靠政治手段會-tàng解決，khah小工程，會使先mái講，上大ê問題是做一個國家，著愛有獨立ê文化主體觀，咱若想著一個國家，就會想著hit個國家ê文化特色，台灣所表現ê文化現象攞hō人感覺真中國。這個現象m̄是真意外，長期統治台灣ê政黨來自中國，個ê媒體、教育種種攞kā台灣當做中國ê一部分，台灣人自接呢失去主體觀，真chē台灣人攞叫是家己是中國人，個講話、思考、書寫完全是華語、華文，連自稱本土政

黨ê民進黨mā攞使用華文。語言是文化ê母體，文字是記錄語言ê工具，台灣iāu-koh有一種現象，嘴講台語ê人，beh寫文就用華文，主要是長年來台語文字猶未標準化，有心beh寫台語ê人無適當ê文字thang自由使用，想著寫台語文就驚，社會koh無提供合理ê解決方案，大部分ê台灣語文研究者攞教人用漢字寫台文，引起作者、讀者真chē困擾，一個台文作家beh寫作ê時著愛chhōan真chē古漢字冊、漢字字典，用真chē時間leh chhōe啥物漢字會-tàng代表啥物台語音，讀者mā全款ōan-nā讀，ōan-nā péng字典，khah慘leh讀外文冊。

台灣人會beh用漢字寫台語主要是受著連橫ê影響，伊ti台灣語典內面講「有台語音就有漢字」，為著beh支持這個理論，伊就山中國古冊去四過chhōe漢字來thap台語音，講chhīn-chhái就是「請裁」，意思是請你做裁決。咱

會-tàng舉一個例，若有人問咱講「你日常攞做啥娛樂？」咱kā應講「chhin-chhái lah！」，無啥khah固定ê。」若照連先生ê解說m̄就講「我日常ê娛樂無啥khah固定ê，你歡喜啥就講啥好lah。」按呢kám有對tàng？連先生研究台語完全是khia ti漢字本位，台語著愛去遷就漢字，無hit款漢字ê台語就mài用，伊根本都無了解台語是多語源ê話語，m̄是kan-taⁿ Hō-ló話niá，上重要ê是有真chē原住民平埔語kap日本語，漢字是beh án-choaⁿ表達？目前台灣研究台語ê人，ká-nà連橫ê信徒khahchē。

發行台文通訊雜誌ê目的之一就是beh解決頂頭所講ê問題，推行講台語、寫台文，建立台灣本土獨立自主性ê文化思考，替台灣前途chhōe定位kap方向。真chē人講「無文字ê民族就無歷史，無歷史ê民族就無將來。」台文通訊上明顯ê特色就是漢羅並用，台語內底漢字khah無爭議ê就用漢字，hō受漢字教育慣sí-ê看khah有，chhun ê chiah用ti台灣已經使用一段歷史ê教會羅馬字來表音，hō寫kap讀ê人攞真方便，hōan-sé有人講「羅馬字看無。」台灣人肯用十幾年ê時間去學漢字，soah無愛khai幾點鐘來bat一套kan-taⁿ十八個字母kap五個表調符ê羅馬字，按呢kám講會得過？

台灣人 hō 漢人意識 thāu 幾百年-a，ták 項攏用漢人做中心考慮，講著基督教、天主教就講是外國宗教，ká-ná 佛教 kap 道教是家己 e 宗教全款，講著英語、日語就知影 he 外國話，ká-ná-wú kā 中國話當做外國語，看著 ABC 這款豆芽芽 a 就講 he 外國人 A-tok-á-e 字，kā 漢字當做台灣人 e 文字，講是祖先留落來，咱 e 文化資產。這種講法有偏差，台灣文化 e 根 m̄ 是 kan-na 漢字 nā-i-iā”。講實在--e，台灣人漢人成分有 jōa- chē 需要做血 e 檢驗；咱 e 祖公，講是來自台灣海峽 hit pēng，當初時會冒險過台灣 e，bat 漢字 e 有幾個？讀者會 tāng 做一個調查，轉去問老 pē，問講個阿公 kám 會曉寫漢字，相信 bat--e 無 chē，咱 cha-pó- 祖就是 hō bat 漢字 e 統治者欺負 kah 繙得生活，m-chiah 搬來台灣 tōa。台灣 beh 有獨立自主 e 文化，放棄漢人沙文主義觀點是上基本 e 開始。

台灣人長期受外來政權 e 政治迫害，一直想 beh 用政治手段解放政治 e kē，咱承認 che 是必要 e，m-koh 無夠積極，政治抗爭著愛有文化內涵，文化 e 自主性若無建立，政治抗爭準講成功，台灣猶原需要二次、三次革命；咱若建立主體文化，beh 處理政治層面 e 問題就加 khah 簡單。台文通訊 e 同工，ui 創始者、發行者、編輯者到幹事義工，就是了解這個問題，chiah 會 ták 個甘願全心力投入這個短時間內看繪著成績，無啥 phòk-á 聲 e 長期工程。這個 khang-khōe 無受著社會本土界 e 重視，che 是料想會到 e，阮無怨-chheh，這個苦杯是家己討來 e，behkā 台灣這個十字架

phāiⁿleh 肩 kah 頭當做十字架，有啥權利 thang 哭 iau？

台文通訊出刊到 taⁿ 三年 khah 加，會 tāng 維持 hiah 久，內容愈來愈成熟，thèng- 好講是一個奇蹟，同工 e 拍拚 māi 講，上值得 o-lōe 是讀者、支持者。咱所有 e 訂戶 m̄ 是一個一個去 kā 人勉強推銷 e，是個家己雜誌看了感覺值得 kā 支持、訂來看，自動寄錢來訂 e。訂戶以外，咱看雜誌 ták 期下 kha 欄 e 贊助徵信，ták 個月攏有 hiah chē 热心 e 人寄錢來，咱若 chim-chioh kā 相，會看著真 chē 人 tiān-tiānⁿ leh 寄，繪繪教會 e 月定奉獻，hō 咱感覺愈做心肝頭愈燒 lōh。

台文通訊若是 kan-na 一份雜誌，beh 維持落去無啥困難，北米洲 teh 編輯、發行有聰美姊記念基金會 teh 負責，台灣收 e 訂費、贊助金 tī 台灣做印刷、郵寄、厝稅行政，勉強差無 chē，m̄-koh，台文通訊 e 目標是台灣文化運動，thang 講是借雜誌做文化思想起造，同工 ná 親像台文 e 傳教士，時時 ti 全世界各所在做夥拍拚。當然台灣是重要 e 戰場之一，但是支持台文運動 e 資源卻 m̄ 是真充足。老實講，台灣 e 工作處目前有一 kōa 問題，ti 短期間內著愛解決。

咱台灣這 pēng 現此時有三個專業 e 工作者，陳明仁、陳豐惠 kap 廖麗雪，處理台文通訊 e khang-khōe 以外，koh 著辦活動，親像台文通訊讀者聯誼會、台文寫作會、台語詩歌活動。Mā 著四過去做台語教學，ti 大學、高中 e 台語社團 kap 社會團體，koh 著愛

去民主電台做台語節目，攏總做六間電台，che 大部份是無料 e，連車錢、所費都 khai 家己 e。台文通訊為 beh 推 sak 台語，koh 招募資金開台語傳播公司，出版台語文學有聲叢刊 e 定期錄音帶雜誌，mā 經營台笠出版社，專門發行台語冊，ti 這個階段 e 台灣社會，che 攏繪趁錢，m̄-koh 這 chūn 無做，後 pāi 會 hō kiāⁿ 孫怨嘆。

為 beh hō 工作者有收入 thang 維持基本生活，咱有 ti 台文通訊發起認養活動，招共同發行人，按月寄錢 hō 召集人張復聚醫生，張醫生一個月匯四萬來，陳豐惠、廖麗雪一人兩萬，做個 e 月給。Ti 台北市一個月兩萬，著負擔厝稅、三頓、交通，有 khah àn，有總是 khah 贏無。陳明仁厝 nih 哪物攏無，kan-na 有一身軀債，日常生活著愛去引一 kóa 外路 ásit- 頭、寫一 kóa 物件來相添，大部分攏是靠阿惠 e 月給食飯。這當時共同發行人 e 認養狀況 iau 無好，一個月四萬強 beh 發繪出來，若 khah 好 leh，看會 tāng 發六萬，hō 「做者有其薪」。

台文通訊一年差不多紅字有二十幾萬，éng- 過-a 是攏北美同工 chhoē 人分 phenⁿ 擔起來，che m̄ 是久長 e 頭路，mā 著想辦法解決，台文通訊 ti 台灣 e 發行費用著愛自立自足，按呢台通訊才有法度 ti 台灣 e 土地生根。Koh 來上大 e 麻煩是咱台北和平東路辦事處是 kā 人稅 e，今年人 beh 討轉去家己 tōa，限咱四月進前著愛搬。Ti 台北稅厝 khiai 真麻煩，常在 leh 搬厝，che 都價 si-a，無要緊，khah 慘 e 是 m̄ 知 beh 搬 toh-lōh？阮 mā 考慮 beh 徒去中南部，台中 iah 是高雄，chhoē 厥稅俗 e

, koh thangkà一kòa新資源，開一個新戰場，ng-望大家小注意leh，有好所在täu相報。

Tí 1995新ê一年，咱著會記得，一百年前，咱hō日本人統治，台灣人換講日語、寫日文。五十年前，咱換hō中國人統治，台灣人改講中國話、寫中文，五十冬來，大家講、寫kah歡喜kah，咱推sak台文hō台灣人罵背祖，台文通訊採用一sut-á羅馬字，hō人kēng-thé是西洋ê買辦、基督長老教會ê護法。1995，台灣m̄知koh著愛換頭家bô？台灣人是m̄是著愛有備辦心，重新建設咱ê台文台語。

台文通訊無論tù著啥困境，一定著愛繼續撐落去，kap台灣人做夥建立台灣語文，hō台灣人免koh做國際文字kap語言ê流浪漢，換一句khah時行ê政治語來講，就是beh做「台灣飄浪語文ê終結者」，che著愛靠你我大家拍拚。

[心道ê台語之一]

阿義ê故事

◎陳憲國 / 1994.12.04 寫作會

以前嘉義有一個人，名號做阿義仔，伊單單會曉講ji，bē曉講gi。以後伊搬去宜蘭，做生理去趁著錢，就去kap人選舉做縣議員。做一任了後，伊就無愛koh做啊，人kā問講是接怎。伊講：「我阿ji仔，原本tōa tī嘉ji，以後搬來jī蘭，聽人講做ji員誠讚，我就kap人競選縣ji員，我mā有當選縣ji員，mā有去縣ji會參加會ji，我有kā提ji，mā有kā附ji，到煞尾mā有真chē é決ji，但是結果我看來看去贏無ji。」

惡人無膽

◎洪錦田



有一個做木ê，爸母生成，講看著漢草有、力頭飽。M-koh頭殼無的確是一流ê。師父做幾仔年囉，就是無彼囉師父路額，連講話mā粗嘴野斗，擔堪得hō人kā激兩句ah，就性地già咧phut-phut跳。個hiaê師父伴ê，知影伊ê性地，koh刁工三不五時就想空想縫behkā創治。有當時仔就妝神妝怪來kā嚇驚；有當時掠寡死蛇、死蜈蚣趁伊tū龜ê時，kā穿tōa衫領領內，hō伊驚kah chhìn汗chháp-chháp津，魂失魄散，才知原來是大籠好看頭，猶原有破卦著。

有一擺，這個低路師，講是嘴齒疼kah ui-ui 鑽，人kā報伊去chhoê一個上奇頭ê嘴齒師。做木êm̄知半項，就「急病亂chhœ醫」，一聲就去hō這ê術仔仙治療啊！

先生頭見面就叫伊嘴peh卡開咧，通好hō伊檢查。一看，哇！無挽敢會煞得？m̄-koh這箇孝呆ê極無膽，先生一下chhoân家私，猶未出腳手，伊就哀kah m̄成聲喉，害先生煞擔得通做工課。

先生按算講這條錢無才調趁，就kā講：「tañ，你按呢大細聲咻噏煞，一寡主顧客hō你驚kah坐噏tiāu，我看你去別間chhœ卡高明ê先生卡著，我無法度.....。」「失禮啦！失禮啦！」做木ê

就kā回講：「先生啊，我這陣是心肝縛縛，足擔定著ê！無，拜託一下講，你斟一杯仔酒hō我tè定助膽咧，按呢凡勢我就會當鎮靜落來koh。」

先生mā無嫌伊三二，tōh斟一杯酒hō伊。這ê孝呆ê lim了後，有遐久啊，先生就kā挽囉，伊又koh連連搖手，哀講：「小等一下！」續落koh再三想求先生講：「好心...ê，先...ê啊，我chit-má tū有卡著定，m̄ koh膽頭猶無開咧，拜託咧，koh斟一杯hō我，kā讀落去著卡好勢。Hañ！拜託咧啦.....。」

先生是歸腹火強忍tiāu咧，前到今mā m̄-bat tīg著這款厚事屎ê鈞頭，就目chiu chiáu轉白仁，koh斟一杯比頭抵即卡大杯hō伊，看伊拍算beh變啥蚊？彼ê孝呆...又koh啊一聲，歸杯栽無停，按呢杯乾嘴空，人mā滯遐馬西馬西。

Tañ好啊，這擺會使得挽咧hohñ！先生一下踏倚去，疋知tī當時，彼個孝呆手骨去moh著一枝酒精矸仔，大聲喝講：「啥物人有hiah好大膽，敢kā我挽嘴齒啊？恁爸存辦老命beh kap伊稱肉凍，看啥人敢倚來講？」

衆人一聽著伊按呢喝，歸間ê患者個個走kah若飛咧，目nih仔久，剩這個「挽齒仔先」坐滯椅條死giān-giān，兩蕊目chiu是驚kah柴柴柴。

拯救母語臺灣話

並

振興羅馬字臺語文

◎ 許誠穎牧師

十月有內蒙古青年合唱團來台灣演唱。個稱做「北京語」為漢語，而是國語。ti大陸通稱是「普通話」而是「國語」。用「國語」稱呼北京話是國民黨對台灣人旣歧視政策所產生。電視、電影劇中歹人攏是講台語，講台語的角色攏是無學識、無教育的下等人。Ti學校中禁用台語，這種可怕的教育政策，已經 hō台灣人及台灣教會中毒真深。無論ti日本、美國、台灣長老教會青年，攏愛去聽高級（？）語言北京話教會講道，因爲個見羞聽台語？聽無台語？聽北京話卡合口味、卡高尚？台灣長老教會主日學用語百分之八十是「北京語」。咱青少年失去母語，也就有信仰也會離開台語教會。台灣長老教會增長慢以及北京語教會興旺，外來政權所訂的語文政策，是一個真大原因。台灣長老教會生產、培養，北京語教會來收成。可驚的是失去咱教會的人數，乃是咱後代失去個母語，成做無主體性台灣人，失去自尊台灣人。

王育德先生是一生疼台灣，闔努力母語台灣語推廣偉人。伊有發明幾套台語文的文字，總是ti beh過往以前，有警覺母語台灣語會消亡的可能性，就將伊心血「文字」取消，呼召伊的學生，緊

來通用「教會羅馬字」來拯救母語、台語文。實在是母語台語文是無馬上落去做bē使，這時做，就無閑有機會囉！

拯救保存母語法度簡單，只要做台灣人若有自覺家己是台灣的主人，有主體性，甘願擔起做主人的責任kap覺悟學習先人開墾台灣的開拓精神，而驚阻擋就會。

這法度簡扼要來講，有：

1. 叫醒台灣人有台灣主體性，台灣主人的意識。
2. 開放電視的惡劣語言政策，尊重各種台灣言語，一律平等使用各種語言。
3. 要求電視台現有所謂閩南語節目爲台灣語或爲台灣河洛話節目，並請換用講台灣語的廣播員，而是廈門話抑是閩南話的廣播員。

4. 叫醒大家，特別是爲有細囡的父母以及tit-beh有細囡beh結婚的青年著ai知：學台語對學習北京語nā無阻擋，反轉有幫助。闔先學習台語，抑是同時學習台語及北京語（由父母任一方堅持使用一種特定的語言，Webster英語字典工作者，ti幼嬰時由七種言語的人，同時kap伊生活，使用各人旳言語，就會講七種言語，這是事實。我孫會bat四種語言，

台、北京、法語、英語）犧牲母語來學習北京語是極大的損失闔無必要。

5. 先學會台語，beh闔來學北京語無困難，先學北京語才beh來學台語卡有困難。簡單講，台語有七聲，包括北京語的四聲。何況，國校以後就自然有政府會教咱細田北京話，豈有必要先煩惱無機會學北京話？

6. 人人講台語（至少ti beh來十年久，爲著再建立台語的地位，到kap北京語平爲止）。正式的儀禮、議會等，學校的聚會中，多多使用台語。

7. 支持已經開始的國校、國中、高中母語教育，大專學校，特別是師範學院kap大學ai列台語爲必修課，並設台語研究所。

8. 鼓勵人人多寫台語文作品、文學、論文，多用現成就會好用的漢羅書寫法（漢字kap教會羅馬字）來寫文章，來通信。

9. 請用台語講道的牧師，若beh投稿ti教會公報，就應該照所講道的語言來用漢羅書寫刊登，nā-si闔再改做北京語，讀起來對台灣人的心，欠少共鳴心動，闔失去推動母語的運動的機會。

10. 一方面贊助母語教育的推動，一方面著ai tit卡早時期教細囡ti幼稚教育時期開始指導「羅馬字台語教育」，無羅馬字就無容易讀出正確的台語發音，亦be寫全台語文，所以學習教會羅馬字是beh拯救母語，推廣母語是做使無的節目。

總講就是，講母語、寫母語是做台灣人應有的基本主體性的工作。闔學習教會羅馬字是振興台語文母語一定愛有的事！

你嘴裡 ê 話有真 chē 是 日 本 進 口 ê

日本用語流傳入境 ê 過程 kap 文化 ê 含意



Chit-má tī台灣通用按日本借來
é專有名詞 behkah 有五百個，咱長
期使用但是 m̄ 知影個 é 來源，其實
這龐是 iú 清尾民初開源 é 文明傳播
過程，為著辦事效率 kap 方便，借
日譯文字 kā 西方新知識大量輸入
，才造成中文隱性 é 日語化。

這幾年來，不時有東洋氣味 é
新名詞引入台灣。除了「幹事長」、「世代交替」、「派閥政治」
這類政治用語，以外也有「暴
走族」等流行字眼。事實上，m̄
nâ 按呢，凡是 chē 少有討論、分析
、批評性 é 文章，就真困難無用「
日本製」é 用詞。

目前 tī台灣，學生到大學畢業
以前，所 hōr 人教授 é 日本歷史或者
中日關係歷史，大部分無出戰爭
、侵略、起源 kap 文化範圍。講戰事，
一定是甲午戰爭，台灣陷落做殖民地，
日本侵佔東北、成立偽滿洲國、八年抗日。講起源，
徐福帶一群人去日本，一定是大
和民族起源 é 一個傳說。論著文化
，所講 é 就是單向文化流通。也就
是大化革新，盛唐起二百六十年中間，
日本派遣唐使十八擺，學習中原文化，創造平假名 kap 片假名；王陽明學說傳去到日本等。
所反映 é 對日本 é 態度，m̄ 是文化
宗主，就是以德報怨 é 恩公。關於
文化回流 é 一段歷史，就是有看 tēn

無看，khig 作一邊免講。

近代 é 日本 kap 中國龐向西方
學習，但是兩國學習 é 態度完全
無像。十六、七世紀時，利瑪竇
、湯若望 chiaé 外國傳教士來到中
國，中國人無需要向個學洋文、
翻譯書，chiaé 傳教士自動用漢文
寫出「萬國輿圖」、「幾何原本」
kap 「乾坤体義」等二百外本
近代文明 é 書。十九世紀下半期
，教會閱出版數百本漢文書介紹
西方智識。可惜 é 是，chiaé 書 tī
中國若像土牛落水化無去，無引
起刺激 é 作用。

搶學文明 tī 東瀛

日本無中國 hiah-nih 好運，
這批漢譯書或者漢著書等到十八
世紀幕府開放洋書禁令以後，才
按中國傳入去。但是日本智識界
看個做寶。親像英國人 Hobson 寫
é 醫學著作「全體新論」，漢文
本前後 hō 日本人翻印十遍。美國人
W.A.P. Martin 所著「萬國公法」
é 漢譯本有翻印過五擺。

到十九世紀尾，日本設翻譯
西書 tī 「洋學所」（東京大學前
身），中國 mā 設立「同文館」；
日本派學生留學荷蘭，中國 mā 派
學生留學美國，日本擺比中國做
前十年。一八九五年甲午一戰，
中國戰敗。隔轉年，中國第一擺

派出十三位留日學生。根據日本
學者實藤惠秀研究，一九〇六年
留日學生已經有八千人 hiah chē。
蔣介石、戴季陶 hiaé 人也大約 hit 個
時陣去日本留學。

Beh 學習西方文明，無去西洋
去東瀛，原因除了路途近、費用
低以外，整個中國智識界有食多
種維他命，m̄ 食水果青菜 é 心理。
也就是講，中國需要趕緊 jiòk，學
習速度 ai 繫；既然日本已經譯成西
方文明 é 書，日文 é 漢字 māchē，直
接學日文比學洋文卡贏。

古老 é 日本無文學，漢化了開
始學中文，但是中文文法 kap 日語
é 無完全相像，日本漸漸創出「平
假」、「片假」 kap 漢字相配用，
「日文」建設工程才算完成。所
以，tī 中國人眼中，日文 kap 中文
是「同文」。康有為就有講日文
「八成」是漢文。梁啟超 koh khah
樂觀講：「學日文一年就會，寫
作日文半年就成，學日文幾日小
成，幾月大成。」

外來名詞 tī 中原落籍

中國既然用日本做智識 é 中介
站，日本翻譯西洋近代文明 é 新名
詞，若是翻做漢字，字義 mā 會當瞭
解，中國學生就直接引用，進入
中文系統。若是 beh 另外費心，
一字一字斟酌考慮，chhoē 合中文

意義的翻譯，這kap當時beh趕緊追jok西方的心情無合。

為著方便kap效率，真chē新名詞就按呢進入「中原」。一般常講中國屬大陸法系，事實詳細講來，專有名詞是用日譯，像最根本的「憲法」、「民法」、「代理」、「社團法人」、「法庭」、「客体」。其他像醫學上有「內分泌」、「解剖」；哲學上有「哲學」、「唯物論」，理工上有「電流」，軍事上有「番號」、「驅逐艦」、「迫擊砲」，一般生活用品有「目的」、「方面」、「感性」、「意味」、「高潮」、「文憑」、「傳統」、「樂觀」，外交上有「斷交」、「治外法權」。根據學者研究，總數近五百個（一部分請參看圖表）。

到chitmá，chia的清尾民初的新名詞已經hō人用了真熟，百分之一百的中國人看個做當然的中文，但是ti當初，反對異議的人是bē少。

一本名做「盲人瞎馬之新名詞」的書，伊的序講：「曩昔大隈氏重信（注：大隈重新是明治維新重要人物，做過日本議相）笑咱講，日本維新以前，漢文的日本時行，自維新以後，日文的中國時行。我聽著chia的話，深深感慨中國人愈來愈沉落，mī知通自奮。」這本書內面闡講：「大家若像是按祖先承受遺產hit款，嘴內無停teh套用新名詞，閣是ti通信中，mā是十句有六句新名詞，啊！這是真bē見笑的代誌，這是一件關係國亡族滅的事……」。

原料加工回銷蓋地

受異議的名詞有eh後來無繼續

應用，像「切手」（郵票）、「樣」（先生、小姐稱呼）。Mā是有異議，但是到ta继续使用eh，像「革命」、「經濟」。

日本新名詞回流入中國的過程，小寡像是kā原料加工，變做產品，回銷原產地全款。若kā日譯漢語詞拆散，每個單字是由中國人創eh，日本人學去。等到日本輸入西方智識eh時，日本人重組漢字做新詞，回銷中國。

回銷的媒介自然是留日學生上chē，個或者譯日文原著書，或者譯西書，chē少將日譯漢字詞引入中文體系內面。

這個管道也是近代中國西化，引入西方文明上重要eh方式。

商務印書館ti一九〇四年創刊「東方雜誌」，按雜誌頂的新書廣告看會出來。出版新書分做三類：一類是日本人原著，有四十本，一類是西洋人原著，有二十七本，其中除了嚴復譯「社會通證」等二本，林紓等人譯「伊索寓言」是直接按西方譯過以外，其他攏是按日譯轉譯過來，che中間包括北大校長蔡元培轉譯德文書「哲學要領」。第三類，新書是中國人原著八十六種，四十八種是英語教學用書，剩[ohhun]的三十八種大部分kap日本有關係。

台灣的教科書單單hō人知影，有大儒嚴復這個人，翻譯西書「天演論」，對間接輸引智識eh大批留日學生，完全無講起。魯迅kap豐子愷同時翻譯厨川白村的「苦悶的象徵」，日本作家夏目漱石、菊池寬、谷崎潤一郎、芥川龍之介ti新文學活力發展時期引來中國，郭沫若有總結講：二次大戰前的中國文壇大半是日

本留學生建立eh。對chia的狀況，大家會感覺koh khah生分無瞭解！

這種生分就是像大家知影蔣介石去日本讀軍校eh時，khā起來抗議日本教官講「中國人像土內面四億的細菌」，但是mī知影蔣介石請日本教官來台灣指導中國軍將領。

台灣正式教育中，灌輸hō少年人一輩的日本印象，整體來講，有khah「歪一旁」，而且歪闖漏空。若有khah全面性來瞭解日本，也會幫助咱瞭解家己，因為雙方歷史上eh交chhap（插）是相當複雜。

原刊新新聞周刊

1993年2月14-20日

譯後感：

1. 中國文化自大的沙文心態，阻礙中國社會文明的現代化。台語白話文運動是台灣社會的文藝復興運動重要的一環。咱千萬mī-thang閑眠夢ti台灣話

外sūi抵外sūi、是唐朝的國語、孔子講的話，這款漢人沙文主義的大心態。咱著愛好膽大量吸收外來語（包括華文），hō台語成做方便表達現代文明生活語言。

2. 翻譯外文mī-nā會當吸收外來語，也會當吸收外文修辭方面長處。翻譯文學是台語白話文運動一項艱使欠eh工作。


3. 台語真chē現代用詞是直接按日語借過來eh，有寡借eh詞及中文全款，有寡及中文無全，「台灣中國文化沙文主義」無承認台灣人有按世界各國借外來語的權利。抵了少數eh例外，台語辭典收台語已經有teh使用eh辭真保守，以後新編的台語辭典這方面應當加強。



● Tân Hui-Chhiong

落雨天 kā 伊講做是歹天是無公平 ê，因為落雨是自然 ê 現象，閭卡有伊 ê 必要性。假使規年 thàng 天攏無落雨，請問咱每日所食，所用 ê 水 beh 對叨位來？敢彩有人 beh 講，現代 ê 科技發達，我挖 [ə] 深井，用沉水式 ê phóng-phuh 來抽，就會得著水，但是經驗 kā 咱講，水 ūn 愈抽愈深，地層也會下陷，屏東沿海養殖漁業大量抽地下水 ê 緣故，致使 hō 彼地方 ê 曆一直沉落去，就是最好 ê 證明。

其實，落雨天 mā 有伊對每一個人卡直接 ê 好處，上界明顯 ê 就是七、八月炎熱 ê 天氣，若落一陣大雨，你 ê 身軀所感覺 ê 凉爽是現代 ê 冷氣機所 toè bē 著 ê 。你暗時 mā 會真好睏。閭有，一陣大雨過了，樹木花草所顯出青翠 ê 色緻會 hō 你 kah-i [合意] 去欣賞。最重要 ê 一項，就是大雨過了空氣 ê 品質會大大改善，空氣 ê 污染 hō 現代人無法度呼吸清氣 ê 空氣，若閭無落雨來調和，所產生 ê 弊病 beh 閭卡 ché 。所以落雨天並 mā 是歹天，伊提供人類 ché ché ê 好處，反倒轉來講，所謂 ê 好天（也就是出日頭 ê 天）mā 會熱死人。



● 阿樹

台灣本是美麗島，代代以來並無啥物激烈 ê 意識型態 ê 對立。現在所講 ê 「台灣問題」 ê 產生，只有一個凶手，就是「中國情結」。

最近這款惡質 ê 「中國情結」 tī 中國人 ê 大眾媒體 ê 煽動之下愈 tōh 愈猛，放聲講啥物十二月 ê 選舉了後，若是 hō 台灣人選著，中國人一定 beh hō 台灣人「好看一下」，意思就是講中國 beh 起歹面：有人講是四點鐘會解決台灣，有人講四十分鐘。所有膨風話龍講若台灣人無 beh 留一寡面子 hō 中國人，台灣會死。

這個惡質 ê 暗流經過基督教 ê 神靈派、佛寺 ê 妖言派、慈善事業 ê 慈善派，講啥物一九九六年就是中國打台灣 ê 決戰年，所以著緊緊出國移民，毛里斯亦好，蓮花島亦好，全世界各所在攏會通移，只有差一步無移入去地獄。中國仔報紙閭卡作弄，講啥物台灣今年對外移民是舊年 ê 三倍，智識份子四位已經有一位移出去外國。個恨繪得台灣早日變做一個恐怖 ê 世界。

這款煽動 ê 白賊話，小寡有智議 ê 人一看就看到中國人 ê 嘴裡 a，小寡有國際觀 ê 人，一看就

知影 中國這款國家，m̄ 免講佔台灣，目前連維持伊國內領土最低限度 ê 統一 mā 有困難；何況伊同時猶 teh 數 [siāu] 想日本美國西歐資本國家 ê 援助，所以若 beh 動兵，台灣未死，中國就先死。

雖然按呢，畢竟明眼 ê 人 tī 台灣猶是有限，卡 chē 猶是逐日坐 tū 電視機頭前 ê Obasan，逐日 teh 讀中國人 ê 報紙 ê Ojisan，chiā ê 人對大眾媒體 ê 抵抗力真弱，真容易受毒菌侵入，結果真大多數 ê 台灣人 ê 思想型態 kap 價值觀念受真大 ê 彎曲變形，良心受遮蓋，力量受抵消，行動受制限。聽宋楚瑜用台語講「我是食台灣米大漢.....」 ê siau 話，mā 聽 kah 目屎流，目屎滴。

更加嚴重 ê 是代表制衡力量 ê 在野黨，個 mā 為著選票 m̄ 敢主動 tī 競選 ê 公開場合宣揚獨立建國 ê 理念。這款情勢受害最大、最深 ê 是台灣社會一般 ê 勞苦大眾。幾十年以來，台灣人獨立出頭天 ê 心願 kap 期待，tī 受高深教育 ê 民進黨 ê 思想家 ê 「領導」 kap 「運作」之下，變做一項 m̄ 免閭出聲 ê 「副題」，變做「選舉」 ê 犧牲品。

台灣大眾 ê 民心實在是一面明鏡，這個明鏡簡單清楚一見就明，m̄ 免啥物歪哥理論，m̄ 免啥物玩

弄文詞。民進黨^{tū}這個競選^é關鍵時刻，第一迫切、第一重要^é功課，應該就是將台灣「獨立」這個看板搬出來，祀^[chhāi]頭前才對，應該利用這個機會清清楚楚教育民衆，台灣獨立是唯一^é活路，台灣獨立是將來台灣^é安全唯一^é基礎。

民衆對這點^é道理心若會通，選票一定^{tāu hō}敢光明正大講台獨^é人。民進黨對這點閃閃避避龜孫孫，不但^{hō}台灣大眾失去期待^é方向，更加是提供中國仔新黨批傷民進黨^é材料，講民進黨無^{lān pha}，愛獨立闖^{mā}敢講台獨，講民進黨不過是一群歪哥^é政客，只要愛權勢，無愛理念。民進黨應當即時回頭是岸，臨崖勒馬。

民進黨若無緊緊回頭，結果只有二個結局：第一個結局，萬一若是無講台獨^é人中選，台灣局勢^{mā}是無啥物寄望，台灣變做敵我不分^é世界，不如^{hō}掛國民黨旗仔^é中選，這二、三年之中^{hō}台灣人有明確^é敵人繼續車拚^é機會。萬一若是無講台獨^é人落選，台灣人會愈看民進黨不值，因為伊^{mā}敢講^{mā bē}中選。

第二個結局，台灣^é將來會演變到親像美國全款變做二黨貴族^é

政治，完全喪失民主^é精神。人人攏知美國仔政客不論民主抑是共和，龐是平黑，攏互相^{teh}爭奪社會資源，分配個人權勢利益^é功能而已；共和黨^é紐約市長為著錢勢可以隔暝去支持民主黨^é紐約州長競選，啥物理念、理想攏可以^{piān}落去糞垃圾桶；民主隔暝日可以共和，共和變民主。台灣^é將來^{mā}可能演變做「國民」、「民進」二黨^é「貴族」政治，民仔進可以變國民，國民仔可以穿民仔進^é衫，二個差不多。對台灣人來講，這才是一個真正「悲哀」^é將來。

另外一例來說明民仔進黨「諸公」內面中著中國仔妖言毒素^é一面叫做「語言工具論」，講啥物語言不過是交通「工具」，無必要認真去對付。一個民進黨員選舉^é時可以用父母話去跪票、去拜票、去求票，但是一旦中選以後，^{ti}議會、^{ti}公開^é場合，甚至^{kap}記者會面，舌就捲起來，用一款阿里不達^é統治者^é語言來^{teh}「交通」，這款民進黨^é官員，對台灣真正^é獨立出頭天，無啥物^{thang}期待^é所在。

判定一位官員有台灣心抑無^é，最簡單^é方法就是看伊^{tū}公開^é

場合是用啥物話^{teh}講話。全世界去到叨位這個判定^é標準攏是按呢。一位^{tū}公開^é場合堅持用伊^é台灣人^é老母話講話^é官員，無論伊是屬啥物黨，伊^é台灣心就可以先認同一半；一位^{tū}公開^é場合，^{mā}敢用伊台灣人^é老母話發言^é腳肖，無論伊^é內容是一流^ésuí，無論伊^é形象是如何高尚，伊^é台灣心就先切一半。伊不過是油舌滑嘴到處騙食^é傀儡^[ka-lé]政客而已。

頂禮拜咱^{tū}紐約^é台灣人懷念過身^é王康陸博士，為伊舉行紀念禮拜。會中，大家做伙反省^{kap}檢討台灣人意識型態^é過去，現在^{kap}將來^é問題。過去，日本初代統治台灣總督^é名言是講台灣人好統治，因為台灣人愛錢、愛名、驚死。現在，台灣社會^é現實正告世間人，特別是警告中國人，台灣不但有千千萬萬無愛錢、而驚失面子^é男男女女，^{mā}驚死^é台灣人^{mā}真^{chē}，新^é台灣魂已經成長並^{khā}出來了。將來，台灣人^é主體性，用新^é台灣人^é價值觀，^{beh}突破中國人利用大眾媒體、學校以及社會機關所傳揚^é種種妖言惑說，暴露中國人玩弄政治^é小動作^{kap}小技巧，義不反顧，向獨立^é路邁進。

[心適^é台語之二]

澎湖人



◎陳憲國 1994.12.04 寫作會

有一攏，一個朋友去澎湖追追，走去一個漁村，看著歸

莊^é人攏^{teh}哮，哮^{kah moh-moh}哭，伊著^{kā}個問講是按怎那會哭^{kah}彼呢淒慘，個著^{kā}應講個莊裡哮^{teh}彼個阿水伯仔個困去討海掠魚，去^{hō}魚食去。伊問莊裡^é人講：「恁澎湖人幾代人，歸世人攏^{teh}掠魚，^{á mā}攏^{teh}食魚，^{mā}知影掠過偌^{chē}魚、食過偌^{chē}魚啊，敢^{bat}聽著魚仔哭^{kah}半聲？」

莊裡^é人應講：「^{mā bat}。」「^著啊，若按呢，恁一個人去^{hō}魚仔食去，那有啥物通好哭咧？」所以若講這個人足澎湖人，是講這個人足^{mā bat}輸贏，認贏^{mā}認輸。這是一個澎湖人講^{hō}我聽^é笑話，是^{teh}當做笑談^{nī-nī}，並無對澎湖人不敬^é所在，請澎湖^é朋友^{mā}通誤解。

鳳凰起飛 ê 時陣

(小說)

◎陳雷

(1)

Tî台中這個美麗 ê 都市，有美麗 ê 人做 hō 別人歡喜 ê 代誌，尤其是天暗了後，五彩 ê 燈火四界點光起來，大家就知影是唱歌歡喜 ê 時陣。Tî chia 這個英文叫做 M T V ê 凰凰城，少年歌手 hâi-kat-lah 頭，聲低 [kē] 人緣投，閣會曉唱規條龜是英語 I love you, you loveme ê 歌。陪人客聽歌 ê 小姐有幾倍種化裝打扮 ê 方法，mā 有肩胛頭—pêng 無穿衫 hit 款溫柔肉感 ê 芳味。但是風度標 phiat ê 頭家娘講，唱歌好 bái 卡無差，酒上要緊。

施 sâng 是頭家娘按呢上界親切 ê 叫法，因為陳 ê 有拍電話來通知，這位第一產物保險 ê 經理，到 taⁿ 人生去一半，tú chiá 過五十歲 ê 生日，所以頭家娘有特別照顧伊 ê 面子，五罐 Otar ê 酒罷是伊親身行穿長 liâu ê 腳步來 kā 個開 ê，閣講施 sâng 特別人客，happy birthday，開二罐送一罐。吩咐飼果子 ê 小姐，西瓜子 thuh hō 清氣，飼卡細嘴咧，m̄ 通 hō 別人客 châk 著。講來施 sâng 是陳 ê 紹介來 ê，照鳳凰城 ê 規矩，抽頭是二成。

M-kú 今仔日施 sâng lim 酒聽歡 ê 心情，繪輸一塊挾 [giap] 三層豬肉 ê san-to-i-chih，有二方面：一方

面按產物保險 ê 立場來估計，人生不止是有成就啦，伊時常 kā 人客講，第一保險是永遠第一保險 ê；另外一方面，khiāti 五十歲生日 ê 場合來觀察，總是愈來有「chiūn siap 就 liap」，青春 m̄ 轉來」，彼款 ê 感想 kap 氣概。有人講這是查甫人中期心理衰弱 ê 問題，好佳哉，頭家娘看真 ché，上有理解，凡是來 tî 凰凰城 ê 人客，真 ché hō 小姐飼細嘴果子慣勢 ê 經理，kap 施 sâng 全款。照頭家娘內行人 ê 判斷，這個症頭 ài 去 chhoe 阿肥，m̄ 是講聽歌 lim 酒就會當解決 ê。

(2)

阿肥這行生理 tî 咱 chia 警察局算起來是屬 tî 娛樂業，因為是介紹查某團仔 hō 別人客娛樂歡喜彼款 ê 代誌。生理平平按呢做，阿肥 ê kap 人無像，貨色好閨 ché，尤其是彼 lō 七少年、八少年 ê 查某團仔，講是頭擺上市 ê 新雞 noānⁿ，普通人 chhin chhái kā 伊叫做「開酒矸」，也有人卡粗魯 kā 伊叫做破西瓜，意思全款，但是價數 kap 普通 ê 就無像。頭家娘吩咐，經理 beh ài ê，特別拜託，價數無問題。講來這人客是頭家娘介紹 ê，照規矩 mā は 抽頭二成。

結果施 sâng 本人這方面也 m̄ 是完全外行，雖然酒 lim 有了淡薄 a 醉，m̄ kú 一分錢，一分貨，確實有 hit ê 價值啦。這個細漢 ê 查某團仔，穿一領 lâulâu ê 大人衫，抹一面厚厚 ê 固脂粉，問伊講是十八歲，看來 mā 猶未十二、三歲 niā-niā。M̄ 知是見笑抑是 m̄ bat，kiukiu 驚驚，kan-na 會曉衫褪 [thng] 起來，直直倒 ti hia，繪 振繪動，一哺 kú 在施 sâng 去舞，嘴唇咬咧 m̄ 敢哀，到尾 a 才痛 kah 哀一聲……有血流出來，施 sâng 才放伊 soah 去。因為頭家娘有講，阿肥保證，有流血才有算數。

Che 細細聲 teh 哭 ê 聲音 kā 伊吵醒起來，目觸 thi 開看，這間豪華旅館以前伊 bat 來過，tû phiat 勢 ê 套房內面，有一張大張西洋式 ê 眠床，一塊框金 ê 大塊鏡，鏡內面有二個褪光光 ê 身體，一個大人肥肥白白，一個瘦烏鳥，雙手面掩咧 teh 流目屎。這個 ka 學生款頭髮 ê 团仔，頭家娘介紹伊來開酒矸，無想著 chiah 愛 hau。頭家娘講，伊 taⁿ-a 開始 teh 發育 ê 青春，繪輸一矸十外年原封 ê 芳酒，氣味充足，實在有影，講了無 m̄ tiöh，比 hekoh-khah chán lah !

這時伊元氣充滿，雄雄有 chiūn siap mā は 繪 liap ê 感覺，按眠床頂翻身 péng 起來，褲袋 a 內 jím 一把錢，beh theh hō 這個團仔。一方面是顧客 ê 滿意，慶祝生日快樂，一方面是 beh 叫伊錢 theh 去買物件，m̄ 通 閣 hau，彼款一般社會 ê 同情心，真正查甫人 ê 氣概，beh 用這五千 khó ê thih-puh 來表示。才注意著這個大蓄目觸 ê 团仔，其實本

來就有一個簡單樸素 ê súi面，m̄ kú伊chit-má一面厚厚 ê 脂肪粉，已經hô目屎hoé bái去 ah，joé做一tah紅紅，—tah青青，親像戲棚頂 ê 做戲仔，真實团仔teh搬大人戲，若真若假。呵m̄ kú這個做戲仔 ê 表情m̄知猶tó—tah面熟面熟？Kā看卡真咧，原來就是kap厝裡上細漢 ê 美珠全款全款，正邊嘴phoé有一粒圓圓 ê、古椎ê 酒窟仔，大家叫伊阿súi-a，……有時阿súi-a美珠má是真愛hau。Soah無意中加問伊一句話，你號做啥物名？這個猶teh哭 ê 团仔，看大人peh起來 a，theh錢beh hō伊，知影今仔日這邊 ê 生理按呢就是beh準soahah，這個大kho肥 ê 人客已經有夠khui，無beh閑創治伊，kā伊按呢生一直舞。伊目屎先停起來，身軀攏猶未掩咧就伸一枝瘦瘦 ê 長手來theh錢，手骨有—tah—tahê烏青，猶kiukiu驚驚，講伊是翠玉。

(3)

若是論這行 ê 專業，翠玉 ê 條件是足好，第一伊是外地新來，面新人客愛，第二伊年歲輕闊有經驗，所以今仔日這個場合，阿肥安排了真妥當。M̄-kú講來人生輸燒酒矸，輸剖西瓜，做處女總是一擺niania，beh按怎專業？這點有生理頭腦 ê 阿肥早就有考慮著，伊有去請教人台中 ê 婦產科。Tú好這位姓黃 ê 婦產科也是有生理眼光 ê 人，詳細問伊生理場處女原裝 ê 條件。阿肥解說hō伊聽：「就是ai有一tah紅紅 ê 血！」黃婦產科講：「按呢真簡單，隨時若beh，chhōa來我chia.....」。

結果阿肥kap婦產科技術合作，查某团仔送去旅館做生理以前

，叫老二 ê 先載去中區黃婦產科hia「檢查」抽血。He醫生有研究發明這種新 ê 婦產科 ê 方法，用一丸藥水棉 a 吸 [soh] 团仔血，khng入去查某 ê 內面，按呢就是保證 ê 處女，tak遍會流血，簡單閑方便，隨時 beh 就有。有時有個团仔像翠玉細漢無膽，看著大枝注射針會驚，狗怪m̄ hō人抽血，就叫老二 ê kap診所 ê 護士來鬥掠，一個掠手骨，m̄ 通hō伊bun，一個掩嘴，m̄ 通hō伊大聲哀，按呢二、三個大人應付一個团仔，用強 ê ，大概攏總m̄ 免十外分鐘就會好勢。但是有時也個掠了siu^nân，团仔手骨會烏青凝血，無啥要緊，家己會好去。

猶一點，阿肥做生理真頂真，凡是新來 ê 团仔，攏會kā個吩咐，說明職業上幾點要點，有時家己先kā個試看mái：倒toà眠床頂m̄ 通振動，嘴唇咬咧m̄ 通哀，了ê 時雙手面掩咧細聲一直hau，按呢thih-puh就會卡chē。阿肥有kā翠玉講，人客hō伊thih-puh若是卡chē，另外就有賞。

所以今仔日施sàng生日這個場合，穿長liâu ê 頭家娘，行路起來，風度標phiat，一切安排了真s̄是。Ti台中這個美麗發展 ê 大都市，常常有一寡人做hō別人歡喜會爽 ê 代誌。就是按呢天暗了後，鳳凰teh起飛 ê 時陣，有ê 人客介紹去阿肥hia開酒矸，抽頭講是起碼二成。但是關於處女品質控制這方面，大部分原在是婦產科醫生 ê 責任，ti台中這個鳳凰飛城市，有tang時醫生界有兼娛樂界 ê 性質。

鳳凰起飛 ê 時陣

(La-li-oh 廣播劇)



◎陳雷

編注：版權所有，若有beh使用本劇本 ê 劇團請事先寄錄音帶來本通訊社

一場（台中鳳凰城 M T V ）

歌手：Ohoh，ohoh，I love you，love you.....

樂隊：Ahah,ahah,you love me, love me....

小姐：施經理，聽歌也著食果子 [chí]，請你嘴開開，hō我kā你飼。

頭家娘：天壽小姐，你是人客beh chakhō死？飼卡細嘴咧！

施sàng總經理，小姐m̄ bat代誌，請你原諒mái受氣。今仔日，我頭家娘kā你恭喜，happy birthday五十生日。你人生去一半，到ta^n想想是啥物？猶是不如好酒開幾枝，阮鳳凰城 M T V，特別為著你，X O 開二罐送一罐，kā你恭喜。

施sàng：少年頭家娘，感謝你 ê 風度kap好意，我人生過一半，卡無你 ê 三分之一。來，來，這杯芳酒lim落去，謙卑請教你，喂！人講「上(chiū*) siap 會 liap，青春而轉去」，這是啥物款滋味？Beh按怎醫？

頭家娘：Phái^講，phái^n講，人生

不如恁保險公司，趁錢hiah容易，講來總是「拖磨」這二字。若是上siap會liap，我想是心病卡phaiⁿ醫。（停一下）佳哉咱台中，王哥、柳哥朋友滿滿是，這方面ê專家是阿肥。我替你拜一個託，khâ一通電話kâ伊通知。

二場（電話中）

阿肥：Oè, oè, 施sâng總經理，咱查甫人趁錢無常在，迫使娛樂是應該，這個問題自古以來，上好是，hô小弟全權處理，介紹你開酒干，開酒干！

施sâng：è--？！túchiahti頭家娘hia, X O 開幾個罐，呵敢無夠味？按怎又閨是？可惱！可惱！

阿肥：Ah（長聲鴉）這酒干m是he酒干！施sâng總經理，你敢攏m知[i]，阮chia燒酒干，ták枝sui當當，七少年、八少年，肥肥瘦瘦，he查某团仔嬰……

施sâng：是彼款ê燒酒干？

阿肥：無m tiöh！原封保證，紅標頭比X O 閨卡讚。這才是叫做開一酒一干！

（khóng！錚聲kóng一下）

三場（台中黃婦產科診所）

黃醫師：（自言）做雞著chhêng，做人著pêng，人講婦產科醫生，趁錢第一等，事實是，生理會做，研究兼發明，處女會當閨再生。再生，是咱環保ê話，物件用了做新ê閨再用。

老二ê：醫生a，老大ê吩咐，這團仔拜託你檢查、抽血。

黃醫師：Taⁿ恁老大ê敢是teh浪笑？這塊团仔phi，十歲加二歲，攏總十二niâ-niâ！

老二ê：無m tiöh，這新雞noâ，青

春是伊ê本錢，翠玉是伊ê名聲，liam piñ經理等beh看。趕緊，趕緊，chiñ市場，減一歲，價數加一萬。

黃醫師：若是按呢免閨等，chhiän時間，再生手術真簡單，護士來，抽血一筒，棉a食血做一丸，醫術高明，khing入去查某团仔空，就是原封新酒干，環保！再生！紅標頭高貴ê新酒干！

雅士：醫生a，有問題，這團仔我看猶真細漢。phiphichhoah，看著注射針，椅a m坐teh beh bun去ah。

老二ê：趕緊，無時間，用強ê，用掠ê卡簡單。

黃醫師：恁二個，嘴kâ掩[ng]咧，手骨掠hôan。

老二ê：Oâ，瘦猴bóng瘦猴，細漢bóng細漢，bun起來閨有幾偌斤力。

黃醫師：掠hô an，掠hô an，liâm piñ就好勢。

雅士：醫生a，無好勢，可憐代，這团仔掠siûn an，手骨一tah一tah，你看——，烏青凝血。

黃醫師：大驚小怪，這款小代誌，免chhap伊，家己會好去。


尾場（臺華旅館房間1010）

施sâng：查某团仔，粉抹厚厚，面看繪透。問你講是十八beh十九，我看是十三猶未到。讚！讚！我mâ是五十tû出頭。看我ê功夫盡展，包你繪無聊。（停一下）這講是新貨，phaiⁿ勢驚見笑，阿肥保證有一tah紅標頭，無彩我食力hut一哺，你雙手面掩咧soah teh哭。Heh，查某团仔嬰，人生ham ham 免計較，若搬戲，有時

大人搬团仔戲，有時团仔搬大人戲，呵你目屎流，目屎滴，無彩一面sûsû胭脂joêbái去。Kâ你講，生理就是，一行[hàng] ê 苦頭，一行ê趣味，有人賣皮賣肉做酒干，hô人爽hô人歡喜，有人辛苦了錢兼做giân頭罵家己。好ah啦，好ah啦，這五千khó ê thih-puh 你thê去，算咱無相欠債，tû起！疑！你這手骨—tah—tah，烏青凝[gêng]血爲啥物？（khóng！錚聲kóng一下）

[心連ê合語之三]

一百外斤ê giâ-kang



◎陳憲國 1994.12.04寫作會

有一個台北人kâ別人講，我bat看過一隻真大隻ê giâ-kang有十外兩重；台中人講：「He那有偌重，阮台中bat看過giâ-kang一隻十外斤咧！」高雄人聽著就講：「He那有希奇，阮高雄ê giâ-kang攏mâ百外斤ê！」原來台北人講ê giâ-kang是「蜈蚣」，所以大隻ê有十外兩，雖然有卡碰風，mâ有可能；台中人講ê giâ-kang原來是「鵝公」，所以一隻十外斤，mâ真平常，一點仔to無白賊；若講高雄人所講ê giâ-kang，恁想講是啥？原來he是ti港口碼頭teh giâ貨ê「giâ工」啦，當然逐個攏mâ百外斤。

[台文寫作會作品]



彼日我kap秋玉去中和市é圓通寺，本來é目的是beh到後山行
行咧，行到石階邊仔，看著樹仔，
頂掛一塊紙枋仔，枋仔頂面寫兩é字「挽面」。樹仔腳抵好有有一é老
阿婆咧kā一個小姐挽面，阮兩人感覺真心適，就倚過去看。

阿婆：小姐，恁beh挽面無？

佳惠：挽一擺外chē？阿婆：
百五。（細聲講）

價數無koân，聽講面挽了會卡
sui，阮攏想beh試看māi。

阿婆：恁兩個啥beh先？

我kap秋玉兩人相對看，相推辭，我靜[chē]伊繪過，就先做實驗品。阿婆叫我坐tū低椅仔，伊替我moa圍巾仔，戴頭毛籠仔，將額頭é頭毛poé去後壁，才繪khàm著面。

伊搓我é面，問我：你是第一
擺挽面hōhⁿ？

我講：阮兩人攏māi-bat挽過啦！

秋玉：阿sáng，挽面敢會痛？

阿婆：liòh-liòh仔啦。

阿婆將挽面é ke-si té ti 餅-
khok-仔內面，ke-si闇繪少，有ka
-刀、頭毛籠仔、挾仔、白粉、

loâh-仔、以及幾仔綑線。

餅-khok-仔內有一個紙盒仔，面頂寫「金三箭白粉」，阿婆thēh一塊粉餅出來，kā我歸é面lùkah白sut-sut，soah-loè ka一條線，線é一頭用嘴齒咬咧，另外一頭用tò-手khiú-咧，伊用正手échéng指仔kā線séh做一個圓框仔，tó-手若giú線，線相絞，就會當順續將面頂面é幼毛挽掉。面先boah一重白粉會當hō面卡滑、卡繪澀，線leh絞面é時就卡繪痛。

阿婆ùi我é額頭先挽，抵著卡長卡粗é毛伊就用手chhoah，若leh chhoah雞毛，我痛kah哀哀叫，面soah結歸kiú，秋玉看我痛苦é表情，笑講：「愛sùi母驚流鼻水！」，我應伊：「等一會就著你啊，免笑啦！」阿婆ná挽ná講：「我kā阮查某孫仔挽面，線ná絞一下，伊就haiⁿ一聲阿媽喂，愛笑kah！有é人生卡惜皮啦，繪痛mā haiⁿ。抵即彼個小姐o-lé講hō我挽攏繪痛，伊以早hō別人挽，痛kah！」

額頭挽完，換pin-邊、嘴phé-、嘴角，下-hái上尾仔挽，挽pin-邊kap嘴角é時上痛，阿婆叫我皮繩卡àn咧，出力hō皮膚結歸kiú，伊絞線é速度chhui卡猛咧，安呢就卡bē痛啊。

秋玉：阿-sáng，你幾歲啊？

阿婆：六十五啊啦！

佳惠：六十五啊！你看起來猶即少年。

秋玉：你做這途外久啊？

阿婆：自做查某团仔我就leh
kā人挽面啊，足久啊呢！

佳惠：你若beh挽面是mā是愛
請別人挽？

阿婆：無囉，攏mā家己挽。

秋玉：家己beh安怎挽？

阿婆：我攏mā kā線縛tū窗仔門，安呢就挺好挽啊。

彼盒「金三箭白粉」盒仔頂畫三支箭，看起來真有古早味，以早外媽開百貨店，有賣一種牌子叫做「三A J é面霜，包裝頂面畫一é查某人é頭，「三A J kap「金三箭」看起來攏是老牌主。

佳惠：阿sáng，這種白粉tah有leh賣啊？

阿婆：我攏是轉下港é時才買--e，我mā知附近tah有leh賣呢。

秋玉：這種白粉敢闖有啥路用？

阿婆：以早我做查某团仔é時攏mā用這做碰粉boah面，哪有像chit-má é小姐化妝品幾仔籜。

莫怪以早é相片每一個查某人面攏白kah像油漆--e。

秋玉：我聽阮阿媽講以早查某团仔beh嫁出去進前廳會去挽面。

阿婆：Tiōh啊，以早規矩是安呢，chit-má無啊啦。有é小姐攏mā去美容院做面，聽講做一擺愛chiaⁿ千籜呢。

阿婆做工課[khang-khoè]真頂真，絞一畳仔就換一條線，一遍一遍絞，kā我面頂懸é幼毛攏chhoah了了。最後伊thēh一支若chhoah雞毛用é挾仔kā我拾目眉，伊斟酌看我é目眉，ná拾ná吐大氣：「無彩人é物，目眉生了即sui，tò-旁哪會塌一溝，無彩人é物啊！」。

聽人講目眉kap運命有關係，我有淡薄仔後悔彼時哪無阻止阿婆kā我拾目眉。我挽煞換秋玉挽，我tū邊仔看，阿婆講秋玉é面卡

碰皮，線卡好紋，真好挽；我 e-pín-邊 kap-嘴-phé 有淡薄仔塌渦，線卡紋 bē 著，而且面卡胡，毛發 kah 粗 hāiⁿ-hāiⁿ，歹紋，真費氣，beh 趁我 e 錢不止仔了工。

挽面這種傳統 e 工夫是以早查某人美容 e 祕方，因為時代 leh 轉變，愛 súi e 查某团仔大部分攏上美

(客語教室) 第五課

台中關係

(Thoi3-chung5 koan5-he)

容院做面，beh 换面 e 人愈來愈少，到這陣會曉挽面 e 大部分是老太太，可能過幾年以後，這種工夫就失傳啊，真拍損。

挽面了後感覺面加卡紹，是 m 是有卡 súi 咧？看繪出來，m-koh 第二工 thiau-a-chih puh kah 歸面，害我歸禮拜龍 m 敢出門。



九一年，黃煌雄先生主持 e5 台灣研究基金會主辦過一場「台中關係」e5 研討會。伊所主持 e5 人民制憲會議，ti7 今年六月選出新國旗 kap 新國歌。Ti7 台灣豬母 m7 食 phun，豬公 toe3 teh siau2 e5 選舉文化內底，這位來自 Kavalan e5 黃煌雄先生是值得咱尊敬 e3。

Beh 學客語，第一重要 e5 就是把握機會來練習。Ti7 台灣，真 choc7 出外 e5 客人 (Hakngin) 攏無愛講客 (hak)。但是 in7 teh 講 e5 北京語 kap 咱 Holo 人 teh 講 e5 北京語是無相像 e5。一款是音母、韻母 e5 差別，另外一款是語詞無相像 e5 緣故，舉例來講：

一、咱 Holoe 無-ung e5 韵母，所以北京語「台中」讀做「Thai5-chong」，但是客人讀做「Thai5-chung」卡 choe7。Hakfa 內底 -ung e5 音 choc7，譬如 fung3-su:(紅色)、khung5-hi(空氣)、khiung-ieng(共樣)、kung5-ngin3(工人)、chhung5-min3(聰明)等等。其他台語無 e5 韵母包括 -iung (iung3-it8，容易)、-oi

(khoi5-su:2，開始)、-ioi(khioi，疲勞)、-eu(chha5-theu3，車頭)等等。

二、Hakfa e5 聲母比 Holo 話加二 e5，有 f'kap'v'。客語 e5 「花」讀做 'fa5'，北京語時 in 読做 'fa'，這 ma7 是客語腔 (Hakfakhiang5)。

三、Hakngin 講北京語 ma7 定定會 ka7 常用語詞 khng3 入去，親像 Holo 人寫華文定定寫「打拚」、「鴨霸」共款。譬如客人 teh 講 e5 人 boe7 博假博就講這 e5 人「假會 (ka2-voi)」，若無就講你這 e5 人 chiah 有「才調 (chhoi3-thiau)」，攏是消遣 e5 意思。真正 o-lo 人愛講「chhin iu5 chhoi3-chheng3 (真有才情)」。

聽我 ka2-voi 講一大堆，後擺大家聽人講北京語時，就稍 khoah 卡注意 e5，聽到客語腔 e5，向準兩句 hakfa 就 ka7 lau3 落去。
1. Ng13henai-vi ke Hak-ngin? (你是哪位 e5 客人?)
2. Ng13 cho-tiet kau5 Nga13 Hakfa mo3? (你會後教我客語無?)

台文通訊收支報告

1993年11月--1994年11月

| | |
|-----------|-------------|
| 收入： | \$21,285.00 |
| 支出： | |
| 印刷 | \$9,160.00 |
| 郵費 | 4,101.23 |
| 美工 | 2,245.14 |
| 打字 | 2,239.07 |
| 廣告 | 450.00 |
| 三週年紀念會 | 1,517.56 |
| 贊助台灣共同發行人 | 1,000.00 |
| 補助阿仁阿惠來美 | 500.00 |
| 補助車禍學生 | 300.00 |
| 代讀者買軟體、書 | 193.00 |
| 贊助台中語文研究社 | 150.00 |
| 其他 | 401.89 |
| 支出總計 | \$22,203.89 |
| 不足 | (\$918.89) |

報告人：黃圭如，聯美姊基金會會計
審查人：黃耀勳，聯美姊基金會監核委員

台灣聯絡處收支報告

1993年10月到1994年12月

| | |
|--------------------|--------------|
| 收入 | NT456,759.00 |
| 支出： | |
| 印刷費 | 174,126.00 |
| 郵費 | 127,912.00 |
| 電話 [到11月份] | 65,428.00 |
| 文具 [含電腦、傳真、影印] | 30,636 |
| 劃撥手續費 | 3,490.00 |
| 廣告費 | 16,674.00 |
| 捐贈 | 6,655.00 |
| 雜項 [花藍、電話機、Modem等] | 25,774.00 |
| 總支出 | NT450,695.00 |
| 結餘 | NT6,064.00 |

報告人：陳豐惠，台灣聯絡處幹事

◎ 語言學筆記之四

語言 kap 方言



◎ 李勤岸

人類目前到底有偌chē語言？

Beh回答這個問題就愛先回答「按怎才算是一個語言？」「語言kap方言beh按怎分別？」

美國英語kap英國英語有真chē è無全, kap澳洲、紐西蘭、加拿大、印度等等國家è英語mā攏有無全è所在, 按呢, chia è英語是beh算一個語言抑是幾若個語言？

中國統稱個è語言叫做中國話(Chinese), 北京話、上海話、廣東話、閩南話……攏是方言。荷蘭人kap德國人講è話外人聽起來全款全款, mā閣一種是荷蘭話, 一種是德國話, 按呢beh算兩種抑是一種？

聖經故事講人類本成是kan-na講一種語言, 所以團結一致, 想beh起造高塔達到天頂。上帝無歡喜, 就kā人類è語言分做幾偌種, 個彼此無法度溝通, 無法度合作, 頽倒不時產生誤會, 致使冤家勞債, 無法度繼續起塔è khang-khoé [工課]。就語言學è角度來看, 人類共同擁有一個祖語(proto language) è 可能性是有, 甚至有語言學家相信彼個共同è祖語是tī非洲。當然另外一種講法, 是講同時有幾若個無全è祖語tī無全è所在發生。Che kap人類學家teh推測人類è起源是全款è道理。無

管是一個祖語, 抑是同時幾偌個祖語, 因爲時間、空間è變遷繼續拆做幾若個語言, 形成幾若個語系(language family)。Ti全一個語言系內底閣一直拆做真chē è姊妹語。

全一個語言到底分拆、變化到啥物程度, 才叫做是兩個無全è語言? Che就是方言kap語言è分界線。這個分界到底是tū啥物所在？實在真歹[phái]掠[hiāh]出來。莫怪有人講語言kap方言è分別就親像陸軍kap海軍陸戰隊è分別全款。

若會當考慮政治è因素, 我想Chomsky è分法是值得咱參考è：假使若講è人互相攏聽無對方teh講啥物, 按呢就是兩個「語言」；假使若聽有, 只是感覺怪怪, 親像外地人è腔口, 按呢就是兩個「方言」。咱講個有方言差。

照一種算法, 人類目前大約有六千幾種è語言。就台灣è語言來講：福佬話kap客話, 互相完全聽攏無對方è語言, 雖然個攏屬全一個語系－漢藏語系。鹿港話kap下港話雖然互相聽著感覺好笑好笑, mā閣閣聽有, 這就是兩個方言。

按呢講, 台灣福佬話(簡稱台語) kap中國閩南話互相攏聽有, mā都算做全一個語言è兩個方言耳耳？那親像美國英語kap英國英語全款, 個只是有方言差è一個語言。美國人mā直稱個è語言是英語。

mā閣beh攏無考慮政治因素是真無可能è, 特別tī台灣kap中國è關係chia-nih複雜、曖昧è時陣。咱若beh真純學術性來講台語kap中國è閩南語是全一個語言, 個中國

人就會真政治性講, 你看, 恳台灣人kap阮中國è福建人講全款語言啊, 所以恁mā通「數典忘祖」, 恳就是中國人啊。

雖然講全款è語言無tū-tū[拄拄]愛建立全一個國家, 親像美國kap英國(若全語言就愛全國, 中國就不應該是一國)。Mā閣個都beh掠這點kap你ko-ko-tiün[翹翹翹]。

所以, 咱mābeh真政治性來宣稱, 台語kap福建閩南語è無全就親像荷蘭話chham[參]德國話è無全是類似è, 聽起來全款全款, mā閣是無像è兩個國家è語言。

1994年6月12日tī Hawaii大學語研所



◎ 寶惠

舊舊、厚厚一本烏皮è像薄, 淡薄土bin沙hō外皮小-khoaphú--去, 撕一一開, 一張一張烏白è像, 一排一排貼kah齊齊, 是tū出世è幼嬰仔, 歸身幅hō白布包kah密密, kan-na看著一個鼻仔nah-nah, 嘴開大大, 啼哭è面, 歸頁攏是這個猶未thi開目-chiuè嬰仔。

Koh來, 嬰仔è目-chiu已經大大蕊, mā知teh看啥；嬰仔瘦猴瘦猴, hō阿公、阿媽掠teh洗浴；嬰仔phóng皮phóng皮, 無齒è嘴笑kah真

甜，猶未20歲è阿母kā伊lám-咧，兩個面龐充滿春風……續落來，嬰仔愈來愈大漢，會曉坐、會曉爬，有兩齒咧！表情足chē，有時仔peng尪仔冊注神teh看；有時仔mohおにんぎよう嘴仔嚕嚕；有時仔肥肥è手chhun直直，chéng頭仔m̄知teh指啥……？

一頁一頁掀——過，chia-è像hō人感覺嬰仔è父母goā-á-nih用心teh記錄個心肝團生長è腳跡。我若有团仔，mā beh接呢記錄性命。

性命，是真奇妙è物件。有è性命tī父母一時è衝動下來到世間；有è性命出世tisù-siè環境：父母無全款è準備心會hō团仔生活tū無全款è世界。若我，我希望會tàng chhoán一個勇健è母体kap有安全感è家庭來ngiā-chih新性命。

M-koh，「勇健è母体」kap「有安全感è家庭」m̄是靠我個人就會tàng 賽成--è。我koh卡按怎注意營養／睡眠／運動，恐驚-a mā無法度對抗惡質è空氣、瀨水kap毒土種出來è米糧！無勇健è母体是beh按怎生出勇健è团仔咧？Koh來，「安全感」——「有安全感è家庭」需要尪仔某感情和諧，有共同經營家庭生活è心、收入穩定等等做地基來起造；m̄-koh，就算chia-è條件龐有，也無必然有安全感！政治／經濟／教育種種問題hō人不安，che當然會影響著家庭。

我無想beh生。講起來，我足無安全感--è。台灣è政治環境行到tit-beh有大變動è坎站，台灣è一切龐需要重建，tī這個舊時代kap新時代è交接點，咱tū好teh做運動性è khang-khoé[工課]，一方面是興趣

，另外一方面mā難免有使命感è關係；興趣加使命感，為著開拓kap推廣，咱全精神投入tī工作，tī這種暝日無聞koh收入有限è狀況下，koh國m̄成國，人活kah介無尊嚴，生困kap咱做夥受苦有啥意義咧？

意義？阮爸-a講：「無生团è查某人m̄是完整è查某人」；阮尪講：「生团hō查某人承擔所有è艱苦，無公平，我m̄甘」；有一個知己è朋友講：「連生团toñ敢，beh按怎建國？」chia-è查埔人è觀點龐有個è角度。對我來講，生就是用盡氣力去pū一個新性命，創造新性命以後愛負責任kā chhiān養，陪伊成長到伊會當獨立自主chiā算告一段落。這是一個挑戰kap考驗。Beh生，就愛備辦心。

定定hōng問講：「Tang時beh生？」我知影chēng錢è艱苦，mā知影無团仔è束縛，尪仔某兩個beh創啥就創啥è自由；阮尪有寫作è本錢，我對工課真熟，若無团仔è拖磨，阮會做真chē代誌完成自我è意義--m̄-koh，因為做同志chiā決定beh kap阮尪鬥陣一世人è我，有時仔會想beh看阮會生出啥物形è因？

像簿尾幾頁是大人chhoē团仔去圓山動物園追追，团仔猶未十歲。「像」到chianâ，以後è日子，因為老爸事業無聞、因為厝內發生一樁事故，我成長è腳跡記錄kan-na這本piúphùè烏皮像簿。

若beh生，我希望學習猶未二十歲就生我è阿母è款式—慈悲、溫柔、無怨言。

[語文動態]



- 合語演員罗chhoē 合語歌星代打

過去長期受外來政權打壓è台語電視連續劇，目前產生嚴重演員斷層è情形，製作單位轉向台語歌星、「國語」演員chhoē適當è人選。台視最近tū通過è台語新戲企劃案「目蓮傳」、「草地囝婿」、「海海人生」前後邀請黃仲昆、龍千玉、林俊彥、施文彬等參加演出。

- 台灣本土文化書局開幕
留美化學博士紀敏雄返台從事文化事業，tī台中成立「台灣本土文化書局」，除了販賣本土文化產品以外，也有beh招生開台語班。

- 「南方客家之聲」廣播電台籌備宗教節目

高雄FM88.5「南方客家之聲」廣播電台準備beh提供每日早起八點到九點、下晡一點到二點、è-暗十點到十二點三個時段hō長老教會鍾懃邦牧師，有負擔beh向客語族群傳福音 è人請kap鍾牧師聯絡。08-737-7170。

- 雅美語新約聖經誕生
經歷八年久，參考十八種讀本è雅美語新約聖經 tī 1994年11月25出世，長老教會蘭嶼區會借用蘭嶼「朗島社區活動中心」舉行感恩禮拜，並用傳統歌舞來慶祝這項thang歡喜è代誌。聖經公會亞太區總幹事蔡仁理牧師、聖經翻譯

專家駱維仁博士、中華民國聖經公會總幹事賴俊明牧師等有參加當日的感恩禮拜。

- 「有聲所在」探討「新台語歌」的走向

CTN電視頻道[pin-tō]最近推出「有聲所在」節目，針對非主流的新台語歌kap個创作者做一連串的分析。這五年來「新台語歌曲」詞、曲方面有重大突破，造成台灣新音樂文化高潮，但是最近新台語歌已經有老化現象，新台語歌手林強、林暉哲、伍佰、陳明章、朱約信（豬頭皮）面臨這項挑戰，choā 推出這個節目。

- 聯邦法院裁判 Arizona「獨尊英語」法案違憲

Arizona "tōk-chun eng-gú" hoat-àn iau-kiù Arizona chiu-chèng-hú kap

in-ê tē-hng chèng-hú teh chip-hèng kong-bù ê sì, it-lüt ài sú-iōng eng-gú. Chitt-tiâu hoat-án i-keng hō San Francisco ê liân-pan siōng-sò hoat-tēng chhái-tēng úi-hoán Bi-kok hiän-hoat, in-úi chit-hāng hoat-án úi-hoán hiän-hoat só pó-chiong ê kong-bù-jin-oân kap bin-chiòng giän-lün chū-iü ê koân-ek.

• 全球刊物「台語網」發刊為著beh推廣台語羅馬字，全部用羅馬字寫「台語網」通訊近期發行，由林洪權先生擔任總編輯。計劃頭幾期挾ti台文通訊內面做夥寄，以後beh收著「台語網」人著愛寫批來台文通訊訂。Beh投稿人請利用電子網路「台語網」
(taigu@hp.iis.sinica.edu.tw)。

- 台灣公論報用台文寫社論

美國洛杉磯發行的台灣公論報最近開始試用台文寫社論，目前除了本通訊以外，所有台灣人報紙雜誌的社論欄是用台灣殖民地時代的語言寫的，無法度表現台灣民族的獨立出頭天的決心。公論報用台文寫社論這項代誌雖然無引起文化界的注意，但是已經得著台語白話文運動界的肯定，相信以後台灣若是有建國，che是台灣人報紙史的一項大代誌。

• 「多桑」蔡振南出台語歌專輯
侯校賢電影「多桑」的主角蔡振南出台語歌專輯，有收台語老歌新唱，也有創作曲。其中一首「母親的名字叫台灣」是伊kap吳念真主持call-in節目時，一位工人拍電話入來唱hō大家聽的創作歌曲。

Tai-Bûn Thong-Sin

22115 S. Vermont Ave.
Torrance, CA 90502, U.S.A.
FAX: 310-618-1580
E-mail: LATaibun@aol.com

NON PROFIT ORG.
U.S. POSTAGE PAID
TORRANCE, CA
PERMIT # 453

台文通訊
台北郵政7-575信箱
劃撥帳號:16530211陳豐惠
TEL:02-357-6388 FAX:02-357-6401

- Please send contributions to:

Chhong-Bi Memorial Fund C/O: Westchester Taiwanese Church, 1, The High Road, Bronxville, NY 10708